

Svih ovih dana pokušavam dokučiti šta je to oko čega ovi naši političari vrlo lako postignu koncenzus? I, čini mi se, shvatila! To je, po svemu što vidimo i znamo, jedna jedina stvar - učešće u akciji - **PRODAJIMO DOMAĆE**. Pokušat ću se ne ponavljati, jer sam čini mi se na ovom mjestu već jednom govorila o tome, ali zaista imam potrebu iznova ukazivati na tu katastrofalnu pojavu uzrokovanu provincijalno-skorojevićkim virusom kojim su zaraženi svi naši političari. Taj virus kombinovan sa drugim rizičnim faktorima kojih imamo u izobilju - naime pohlepe, neznanja i pratećih gluposti kojih na ovim prostorima nikada ne manjka - dovodi do uspostavljanja jednog novog adeta iliti običaja koji se zove - klanje vola zbog kile mesa...

O čemu se zapravo radi? Država je, kažu NEKI (a svi ovi "dobronamjerni" stranci samo nam te i serviraju) analitičari, vrlo loš menadžer. Ne umije, kažu, upravljati svojim kapitalom u vidu preduzeća, što je, kao, jasan znak da se što je prije moguće treba rješavati tog belaja i prepustiti to privatnom sektoru koji to, kažu isti ti analitičari, odlično i efikasno radi. Kada bi "slušači" iole imali pretpostavki za posao kojim se bave, onda ne bi samo čitali tabloide i gledali svoje slike po dnevnim novinama, nego bi ponekad pročitali i kakvo ozbiljno štivo, pa se informirali o tome kako je privatni sektor "efikasan" vodio npr. General Motors (trenutno u bankrotu), Craysler (trenutno u bankrotu), AIG (od bankrota ga spasila Vlada Sjedinjenih Država postajući 80-postotni vlasnik kompanije), Lehman Brothers (bankrotirala), skoro kompletan bankarski

sektor Velike Britanije koji nije propao samo zato što je štamparija novca Velike Britanije radila u tri smjene itd. itd. itd... A, evo i nekih ovdašnjih primjera. Prodali smo privatnom sektoru cementare Kakanj i Lukavac, a rezultat - cement u BiH relativno NIKADA nije bio skuplji. Prodali smo i banke, a rezultat - EUBOR pada li pada, a kamate ovdje (ENORMNO) rastu. Prodali smo mnoge koncesije na prirodna bogastva (rude) - rezultat - doveli smo se u dugoročni kolonijalni status, što nam, mislim, ni unuci neće halaliti...

No, s druge strane - prodali smo Mobis m:tel - u koji je, kao što znamo u državnom vlasništvu, a rezultat - Kompanija je u vrlo kratkom roku postigla sjajne rezultate (npr. rast u Federaciji BiH je bio strelovit) pa bi joj i Vodafone mogao pozavidjeti. A, ako ne znate - cijene telecom usluga su ZNAČAJNO pale. To zasigurno nije nešto što se uklapa u floskulu o nesposobnoj Državi...

I onda se sjetim francuskog kralja Sunca (Luja XIV) koji je rekao "Država to sam Ja". Pa, nešto mislim da bi ovo ime trebalo biti češće na političkoj sceni BiH, jer je baš to preovladavajuća percepcija politike naših političara, a rekla bih i većeg dijela širokih narodnih masa...

I zato, ako nam je Država zaista glupa za biznis, vjerujte da nije do nje, već je do (nekog našeg) Luja... **B**

Aida Delić
Glavna i odgovorna urednica